

Seizcin Baij Dan

□ Vangz Gijveiz / 黄启维

Gaenq geij ndwen mbouj ndaej okbae baij dan lo, mbaet youq ranz geij ndwen, vunz dauq dwg cwxcaih le mbouj noix, hoeng baez siengj daengz yaek daengz ndwen daej lij aeu boiz daigvanj dem, lij miz gij cienzyungh song boux lwnyez haihag aeu gyau, mehyah Cangh canghyw ndawsim mbouj onj hwnjdaeu, de danq gaemz heiq naek ndeu. Youh siengj daengz gvan de Cangh canghyw bauqmingz bae haeujoengh Vujhan, lienx mbaw

cingq baij dan ndeu cungj banh mbouj ndaej, miz ndaek roet yungh ha, roet lij raen haeu bw!

Sawqmw, dienhvah yiengj lo, de doq dawz hwnj cie, dwg sing bouxsai sug ndeu: “Daxsauj, gou dwg singz—guenj Siujvuz.”

Mehyah Cangh canghyw ndang saenz liux, de, de baenzlawz gyaep daengz ndawranz gou daeuj ha? Binghraq caenh neix bonjfaenh cungj mbaet youq ndawranz mbouj okbae

baij dan gvaq, geij ngoenz neix cingzvang bienq ndei di, ngamq miz gij siengjap okbae baij dan, lij caengz okbae ne, dienhvah couh gyaep daengz ndawranz daeuj lo, mbwn gaj byajbag! Meh yah Cangh canghyw youq ndaw sim nambyoebbyoeb.

Siujvuz naeuz: “Daxsauj ha, baezlaeng mwngz mbouj yungh banh cingq baij dan lo.”

Mehyah Cangh canghyw naeuz: “Yi, daengngoenz yaek daj baihsae okdaeu la? Mbouj miz cingq baij dan, sou mbouj dwg lij yaek gyaep gou, gaemh gou, fad gou ha?”

“Mwngz couh cuengq bak aen sim roengz ndaw dungx bae ba! Guekgya raeuz seizneix gujli youq henz gai baij dan, coicaenh gij ginghei fazcanj, youq gij seizgan ceijdingh caemhcaiq dieg ceijdingh, cinj hawj baij dan lo!”

“Neix dwg caen ha?” Meh yah Cangh canghyw buenq saenq buenq ngeiz, lij haenqrengz mbaengq swheij

mbat ndeu dem, dinghcinj mbouj dwg fangzhwnz.

Siujvuz naeuz: “Dwg caen ha, yaeuh mwngz gou couhdwg duz mameh seng, gou bang mwngz anbaiz aen dan ndeu, mwngz daeuj bakdou hawciengz hung daeuj ba!”

Bakroen hawciengz hung lai dem le hangz gai ndeu baij dan. Siujvuz yiedcingz vad fwngz coh Meh yah Cangh canghyw, de byaij daengz giz dieg ceiq yienjda. Siujvuz naeuz neix dwg baihgwnz daegdaengq anbaiz, hawj boux ndawranz miz vunz bae haeujoengh Vujhan mienx cienz sawjyung.

Fwj hai mok sanq, binghraq ndaej daengz mizyauq gaemhanh, seizcin daeuj lo, ndit ndat ciuq haeuj aen yienhsingz henzgyaiq aen guek baihnamz neix daeuj, dienhciq raeuj—rubrub, gij nywj rog cueng hainduj heuoiq hwnjdaeu lo, roengq seizcin youq laj yiemhranz heuhgitgit mbouj dingh, gyoengqvunz mbaet youq ndawranz geij ndwen seizneix youh hainduj ndaej okrog bae nyaengqnyat lo. Bakdou hawciengz hung, mehyah Cangh canghyw cingq youq aen dan swheij guh seng’ eiq nyaengq mbouj dingz, rog singz va rang roeg heuh, de roxnyinh gij gingjsaek seizcin gig gyaunde i gig maezvunz!

(sat)

Nanz Haeuj Douranz Nuengx

□ Vangz Gozgvanh / 黄国观

Sai:
Rog canz dak buhmoq,
Lajroq couh dak mae,
Gou siengj yamq haeujbae,
Lau vunz daez(dawz) bakdou.

Mbwk:
Buhmoq dak rog canz,
Douranz fouz vunz daez(dawz),
Beix yamq hwnj mbaeklae,
Couh ndaej yamq haeuj ranz.

Sai:
Gou yaek yamq haeujbae,
Mbaeklae nuengx caen sang,
Gou yaek caeuq nuengx gangj,
Gyadangq gou mbouj lai.

Mbwk:
Beix mwngz siengj gizlaez(lawz),
Daengz lajlai mbouj yamq,
Rox beix sim mbouj ngamq,
Cingq mbouj yamq hwnj ranz.

Sai:
Gou caemh siengj haeujbae,
Gyadaej gou caen hoj,
Fouz duzgaeq gaen noh,
Doiq boh mwngz mbouj gvaq.

Mbwk:
Seizneix seizdaih moq,
Boh gou hix mbouj caz,

Caen mbouj miz huq maz,
Daeuj gangjvah hix baenz.

Sai:
Gou caemh siengj haeujbae,
Gyadaej gou caen gyanq(hoj),
Aeu maz ndenq hawj lan,
Haeuj ranz nuengx saetnaj.

Mbwk:
Bouxlan vanzlij iq,
Lij gwn cij gax beix,
Caiq gvaq bi song bei(bi),
Cawx daeuj hix ndaej baenz.

Sai:
Gou caemh siengj haeujbae,
Gyadaej gou mbouj na,
Raen bohlungz mehbaj,
Aeu maz ndenq hawj vunz?

Mbwk:
Beix mwngz siengj gizwnq,
Mbouj hwnj ranz daeuj youq,
Sim siengj boux dem boux,
Youq sij hwnj ranz gou.

Sai:
Dangh nuengx baenzneix naeuz,
Beix couh daeuj dahraix,
Daengq nuengx doq dawz baij,
Ndingq laeuj daih daegbeix.



Gij gingjsaek gyaunde i Yungzsuij.

Vangz Cunghfu ingj

Baezneix hawj Lungz Byauh ndaej gvaqyinx lo, Siu Cuh daeg—daengq mbouj lanz de, yawj de dauq—dae dwg caensim roxnaeuz gyajeiq daeuj bang bonjfaenh, daengz doek—laeng Lungz Byauh baeg ndaej yaek diemheiq mbouj ndaej, song gen nanggaux, fajfwngz hwnj bop, gwnz ndang hanh dumz, hoeng lij caengz ndaejnyi gij sing Siu Cuh heuh de daengx. Youh mbouj ndei swheij gag daengx roengz yietnaiq, cij ndaej haeb heuj auqmanz laebdaeb gvej.

“Siu Cuh ha——”

Gwnz bya baihde yiengj gij sing heuh he, youq ndaw lueg gongz haenq.

“W——” Siu Cuh sing gok—sadsad dap sing ndeu.

“Daengx roengzdaeuj gwn haeux

caengz?”

“Cingq yaek daengx ne!”

“Gou hix yietnaiq luba——”

“Raeuz itheij daengx ba——!”

Geij boux dahsau doengz mbanj neix, miz boux hainduj hemq, caezgya cungj oksing, youq ndaw lueg baihneix cam baihhaenx han, gij sing youq ndaw lueg gongzgyanggyang caemh—caiq raezrangrang, fwt nauhyied hwnj—daeuj lo.

•Sawcuenhvaez Lwnyez•

Gij Golwngnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

Siu Cuh byaij daengz baihlaeng Lungz Byauh, sing iq naeuz:

“Vei, dou daengx lo!”

“Haxbaenh boux daih’ it heuh mwngz dwg byawz?” Lungz Byauh cuengq fagcax roengzdaeuj, nyaenx fwngz nanq, rumbw cam, “Dwg mbouj dwg Dahyi?”

“Mbouj dwg, dwg Danh Fung.”

Siu Cuh byaengq hung lwgda, “Baenzlawz? Mwngz siengj roxnaj de?”

“Mbouj, gou aeu gyo’ mbaiq de.”

“Ha?”

“De gouq gou lo!”

Siu Cuh rox gij eiqsei Lungz Byauh, ndiengq bak riu hwnjdaeu.

“Hix aeu hawj boux vunz mwngz gwn di hoj cij ndaej, mboujnex haibak haepbak cungj naeuz bangfwngz. Baenzlawz yiengh? Ngoenzcog mwngz mbouj gamj daeuj luba?”

(caengz sat)